

Na osnovu člana 36. stav 1. i člana 58. stav 4. Zakona o upravljanju otpadom ("Službene novine Federacije BiH", broj 33/03), federalni ministar prostornog uređenja i okoliša, donosi:

PRAVILNIK O POSTUPANJU S OTPADOM KOJI SE NE NALAZI NA LISTI OPASNOG OTPADA ILI ČIJI JE SADRŽAJ NEPOZNAT

I OPĆE ODREDBE

Član 1.

Ovim pravilnikom definira se:

- 1) način postupanja s otpadom koji nije jasno označen ili je neoznačen, odnosno čiji je sadržaj nepoznat;
- 2) otpad koji se ne nalazi na listi opasnog otpada, a sumnja se da bi svojom količinom i sastavom mogao biti štetan i/ili opasan po okoliš te zdravlje ljudi i životinja i
- 3) organizacije i institucije koje učestvuju u aktivnostima koje se odnose na proceduru nakon pronalaska ove vrste otpada kao i njegovo adekvatno zbrinjavanje.

II NADLEŽNOST

Član 2.

Nadležne ustanove u slučaju pojave otpada iz člana 1. ovog pravilnika su:

- 1) nadležni inspektor kantonalnog ministarstva za prostorno uređenje i okoliš – u daljnjem tekstu Kantonalni inspektor,
- 2) laboratorija za uzorkovanje i analizu uzoraka otpada – u daljnjem tekstu Laboratorija,
- 3) ovlaštenu operater za zbrinjavanje otpada-u daljem tekstu operater.

III PROCEDURE I AKTIVNOSTI

Član 3.

Procedure kod pojave nepoznatog otpada:

Kantonalni inspektor po prijemu informacije, dužan je izaći na mjesto gdje se pojavio otpad za koji se sumnja da je otpad iz člana 1. ovog pravilnika.

Ako Kantonalni inspektor utvrdi da se radi o otpadu iz člana 1. ovog pravilnika, dužan je s istim postupati kao da se radi o opasnom otpadu, te sačiniti zapisnik.

Član 4.

Kantonalni Inspektor, po sačinjavanju zapisnika, dužan je u najkraćem mogućem vremenu angažovati Laboratoriju da pristupi uzorkovanju otpada, s ciljem analize i definiranja fizičkih i hemijskih svojstava otpada iz člana 1. ovog pravilnika.

Član 5.

Uzorkovanje i analiza otpada iz člana 1. ovog pravilnika vrši se u skladu s internim pravilnikom Laboratorija a u skladu s evropskim standardima o uzorkovanju i analizi opasnog otpada.

Član 6.

Laboratorij je obavezan izvršiti analizu uzetih uzoraka u najkraćem vremenskom roku i sačiniti pismeni izvještaj s jasno definiranim:

- 1) fizičkim i hemijskim svojstvima uzoraka;
- 2) kategorijom otpada iz Pravilnika o kategorijama otpada s listama u koju ispitani uzorak spada tj. njegov ključni broj
- 3) preporukom o načinu zbrinjavanja otpada koji je uzorkovan i ispitan.

Izvještaj se, sa svim podacima, dostavlja kantonalnom inspektoru.

Član 7.

Kantonalni inspektor donosi rješenje o kategorizaciji otpada iz člana 1. ovog pravilnika i nalaže :

- 1) vlasniku otpada da zbrine otpad kod ovlaštenog operatera,
- 2) ovlaštenom operateru da zbrine otpad na okolinski prihvatljiv način.

Član 8.

Troškove zbrinjavanja otpada iz člana 1. ovog pravilnika snosi vlasnik otpada.

Ukoliko vlasnik nije poznat potrebna sredstva za zbrinjavanje otpada obezbjeđiće se iz općinskog ili kantonalnog budžeta.

IV PRELAZNE I ZAVRŠNE ODREDBE

Član 9.

Ukoliko lokacija ili utjecaj otpada iz člana 1. ovog pravilnika ugrožava susjedni kanton/kantone kantonalni inspektor dužan je obavijestiti kantonalne inspektore ugroženog/ih kantona, odnosno federalnog inspektora za zaštitu okoliša radi pokretanja aktivnosti u svrhu sprječavanja negativnog utjecaja otpada na okoliš.

Član 10.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

MINISTAR

Ramiz Mehmedagić, s.r.